

朝鮮亡國史第一編

第一章 朝鮮開國之原始

朝鮮太古時代。原無君主。至中國唐堯戊辰之歲。有神人降於檀木之下。國人尊之爲君。奉曰檀君。國號朝鮮。都於平壤。至武王代商。箕子率中國五千人。避居朝鮮。武王因封之爲王。及漢定中國。有燕人衛滿者。聚黨多人。東渡浪水（鴨綠江）請守朝鮮西鄙。其王箕準許之。後滿設詐計破準。自立爲王。

按或謂檀君姓桓氏。名王儉。神人桓雄之子。降太伯山神檀樹下。號檀君。享壽二千四百八十年。至商武丁八年。入阿斯達山。再歸爲神。此說甚屬荒謬。檀君旣爲神人。何以又爲桓雄之子。其有父也耶。抑無父也耶。如旣有父。則必受父之精而成形。亦祇可稱之爲人。而不可稱之爲神也。此說與姜源履大人之跡而生稷。慶都有赤龍之祥而生堯。簡狄有飛燕之瑞而生契。嫫祖感火星如虹而生少昊。女樞感瑤光貫月而生顓頊。以及印度錫蘭王生而十首。日本國常太尊生如浮脂者。同一怪誕。至於檀君享壽一千四百八十年。亦與中國天皇地皇。各享壽一萬八千歲。人皇九人。合五萬六千年者。

其語相同。蓋太古之時。人多愚昧。惟檀君稍有智識。稍有權謀。遂自稱爲神。以籠絡一時之人民。使之尊已而爲君主。至於享年之久。必爲傳世歷年之數。非檀君一人之壽也。

箕子爲殷之太師。姓子名須叟。紂之諸父也。因紂無道。微子去國。比干諫死。箕子遂披髮佯狂爲奴。後周武王伐紂。定天下。訪道箕子。箕子爲陳洪範九疇。率中國五千人。避地朝鮮。詩書禮樂醫巫陰陽卜筮工藝之流。皆從。武王因封之。於是箕子教民以禮義。田蠶織作之事。而風化大行焉。迄今數千年。依然風俗淳良。人情樸厚。然後知箕子之流澤遠也。

箕子四十世孫名否。否之子名準。與漢之燕王盧縮。畫國界於涓水。後縮自稱東胡盧王。屢侵朝鮮。燕人衛滿。率黨徒請守西鄙。箕準許之。籠爲博士。滿設詐計破準。自立爲王。漢廷因封爲遼東太守。至孫右渠。妨獮韓之通漢。漢武帝遣將殺渠。分其國爲四郡。

第二章 前三韓之源流

其時朝鮮東南一部。別有二國。一曰馬韓。先已併有五十餘國。及箕準爲衛滿所逐。準率

其族。遂奪之自立。一曰辰韓。當秦始皇時。其民苦於征役。逃避於朝鮮之尙慶道。建城柵而自立焉。一曰辨韓。在慶尙道之南陲。原爲齊東亡人。自山東而漂著於此者。

按馬韓因居金馬郡。故名馬韓。箕準旣奪其地。遂立爲王。號武康王。子孫相傳。統治韓族。後爲百濟所滅。

辰韓一名秦韓。國中之人。皆秦之流民。故名秦韓。其地東近日本。交通最便。後爲新羅所滅。其民相率東航。皆投化於日本。

辨韓一名辨辰。其地在慶尙道之南陲。與辰韓毗連。故名辨辰。

第三章 後三韓之婚末

是時更有高句麗。百濟。新羅。三國。相繼代興。高句麗始祖朱蒙。定都於沸流河上。自稱爲高辛氏之後。百濟始祖溫祚。係朱蒙之子。建國於馬韓東北境上。定都漢山。二國俱經七百年而亡。新羅始祖朴赫居世。與金昔三氏。更繼王位。及千餘年之久而亡。

按高句麗爲古朝鮮之地。北與扶餘國相連。朱蒙有力善射。率衆據扶餘。營城郭於沸流河上。滅挹婁。吞人。北沃沮諸部落。其子瑠璃明王。降鮮卑。滅梁貊。屢侵漢境。至新大

王時。漢遼東太守。以兵來擊。王親征。大破之。再傳至東川王時。魏明帝遣幽州刺史毋邱儼屠丸都城。王出奔南沃沮。魏兵退後。王卽遷都於平壤。晉時燕王慕容皝來侵。故國原王拒之不利。單騎出奔。燕兵擄王父之屍。及王母王妃而歸。王不得已。輸貢稱臣。請母及父屍還。後燕爲秦王苻堅所併。始得脫其羈絆。苻堅遣使以浮屠順道。及佛像經典。傳高句麗。沙門黑胡子等。遂奉其教。至隋時。嬰陽王率靺鞨之衆。而侵遼西。隋文帝使漢王諒伐之。煬帝大業八年。親率宇文愷等。渡遼水來征。嬰陽王遣乙支文德。用詭計敗隋軍於薩水。翌年隋又出師往攻。嬰陽王畏之。乃贈日本多金。爲造佛之用。蓋欲結其歡心。以防隋也。嬰陽王祖。異母弟榮留王立。命泉蓋蘇文築長城。經六年而功始竣。時隋亡唐興。榮留王遣太子來賀。唐太宗使陳大德至高句麗答禮。大德審察國情。欲畧其地。時麗濟二國。共伐新羅。新羅遣使乞援於唐。唐因遣使調理。泉蓋蘇文囚唐使者而不還。太宗自將諸軍。率李世勣等來征。用兵六旬。未能獲勝。太宗崩。高宗立。又發兵往征。時高句麗寶藏王。國有內亂。請救於日本。日本出師。往防之不利。寶藏王遂降。高宗分其地爲九府四十二州百縣。置都護府統之。高句麗自開國至此。經三十

八王。七百五年而亡。

百濟始祖溫祚。築城設柵。防鞞鞞。滅焉韓。國勢大振。四傳至蓋婁王。國政大紊。至近肖古王時。以高興爲博士。其國始有文字。至枕流王時。建大學。頒律令。文治甚盛。阿花王繼立。與高勾麗構隙。子腆支王質於日本。王卒。國有內亂。日本送腆支王還國。數傳至聖王。遷都泗泚。國號南扶餘。與新羅戰。王亦被殺。至武王時。與高勾麗和。用兵新羅。以絕朝唐之路。新羅金庾信防之。大破百濟。唐高宗又親率水陸大軍。自萊州渡海。來擊百濟。百濟義慈王禦之大敗。夜遁熊津城。妃嬪皆徒跣從行。至大王浦。投身斷崖而死。後名此地爲落花巖。唐兵乘勝益進。王遂出降。唐將蘇定方執王及太子。大臣渡海還京。百濟自開國至此。凡三十王。六百七十八年而亡。後義慈王卒于唐。餘孽福信。扶餘豐等。請援於日本。及高勾麗。而謀恢復。戰於白村江。而大敗。扶餘豐遂奔入高勾麗。百濟不復起。

新羅始祖姓朴。名赫居世。起于辰韓之東。用日本人瓠公理諸政。齊內治。張國勢。鄰國均仰德化。其子南解繼立。舉日本至名郡人昔脫解爲大輔。妻以其女。委以國政。國勢